



Wöschwyber 2002

1

Die Wintergärte a dr Front darfsch nümme heize.
Süsich isch dert Summer, meint dr Stadtrat zu de Beize.
Was söu das Gschtürm, jetz chasch im Februar scho ga bade.
U zwöinuuzäh im Winter a d Summerolympiade

2

Übere Gotthard, übere Gotthard flüge d Bräme.
U we si übere si, so seit me, si sie däne.
Das hei mir gsunge, s isch lang här, im Chindergarte.
Hüt brumme sie www. wie warte, warte, warte.

3

Dr Bahnhofplatz, dä het me weuä überdache,
Dass me, wes rägnet, ohni Schirm e Schwatz cha mache.
Dä Platz isch wüesch, es stinkt u hingedra dä Gade.
Wenn dä nur gsehsch, dänksch unwiukürlich a Bin Lade.

4

Honegger, Brugisser, Aliesch u dä vom Kuoni,
Die wirtsch nid los, zersch wei sie Gäud, die gö nid ohni.
Bevor dr Corti schaffet, wott er Millione.
Hüt muesch e Niete si, die tües di so belohne.

5

Dr Unggle Fritz het sich la klone wie ds Schaf Dolly.
Fritz 2 isch gwachse, e Kopie, ne ganz e tolli.
Kopie bliibt haut Kopie, isch Abklatsch, he nu, was wei mer?
Fritz 2 isch föifi, geit am Stock u het Alzheimer.

Dr Stadtrat Fuchs het sich drufabe ou la klone.
E zwöite Fuchs chönnt sich für d SVP scho lohne.
A Steu vom Hirni het Fuchs 2 chly Darm mit Faute.
Jetz chasch die beide Füchs nümme usenanger haute.

6

Bim Färnsehluuge tuet dr Bush es Brätzeli ässe.
U scho verschlückt är sich, gheit um, tuet aus vergässe.
Da liit är flach, är, wo als Rambo wetti glänze.
Im Färnseh Schutte luege bringt dä scho a d Gränze.

7

Ir Stadt wird glochet da u dert, d Lüt schimpfe, flueche.
Chunsch niene düre u du fragsch di, was die sueche.
Mir hei kei Ärdöu, Goud, kei Gas, mir tschegges noni.
Jäh so, die sueche vergiftet dr Rücktritt vom Annoni

8

Dr Moritz rennt vo Katastroffe zu Katastroffe.
Är isch ganz bleich vor Schreck u cha fasch nümme schlofe.
Wenns chlöpft, setzt är die truurig Mine uf, die gängig.
Doch Fäualarm - s isch numme öisi Wankdorfsprängig.

9

Do letschi chunnt mi Aute hei stockhagubsoffe.
Är heig ir Chrono es paar auti Fründe troffe.
Är torklet, stouperet u gheit de vou uf d Nase.
„I bi nid abgestürzt, hick, i ha mi Groundingphase.“

10

Swissair, Crossair, Swiss Air Lines, wie söu sie heisse?
E Lifestyle-Guru tuet das nöie Image schmeisse.
Swiss – so heisst si schlicht. Dä Name cha nid trüge.
Sie striiche AIR äwäg, jä wie söu die jetz flüge?

11

Zu Schrott fahrt üse Chlous im Engadin si Wage.
D Olibet verstummt, dr Begert geits a Chrage.
Dr Guggisbärg verschoue, d Frösch tuet lieber jogge.
Kes Wunger rüeft vo letscht vom Münschter d Hänkerslogge.

12

S git Lüt, die wei hie z Bärn e grosse Tunnu boue.
D Frou Frösch schlückt lär, die Chöschte, wie chasch die verdoue?
S git e Lösig, biuig, guet, wo nid tuet störe.
Mir hei a Tschäppät dänkt, dä het die gröschti Röhre.

13

Dr Bärner Stadtrat wischt for you die aute Gasse.
Was die da zämewüsche, dir, s isch nid zum Fasse.
Sie wüsche, wie sie im Rat tüe chäre um e Hufe
Dräck - vo rächts nach links, vo links nach rächts –
vo rächts nach links, vo links nach rächts –
u de ga suufe.

14

Jetzt, wo d Swissair gli nümme umenangerjettet,
Het aus Narr dr Borer ds Schwyzer Image grettet.
E grosse Stouz uf sini Sexyfrou, das heig er.
Ihr Degollte sig beschi Wärbig für Mönch u Eiger.

15

Vo 7 uf 5 wott sich dr Gmeindrat reduziere.
So viu Ysicht, Wytsicht, das muesch honoriere.
We 5 die glychi Buez wie 7 chöi verrichte,
De chönntsch am Änd ja grad uf au die Chläus verzichte.

16

Ohni Gölä u si Rock chöi mir nid läbe.
„Ohni Öfe“, tönst vor Front, „dasch doch drnäbe“.
Ohni Trambillie duesch wie uf Nadle hocke .
Ohni Schueh macht sich e Sans Papier uf d Socke.

Wöschwyber 2002